

# KALATE PAUL A NGA TILI TITUS

## Mebatan

( 1 Tim 1 : 1, 2 ; Pét 1 : 1-4)

**1** 1 Ma Paul, mboésaaé Zambe a nlômane Yésus Krist amu mbunan mintobane mi Zambe a ñyemane benya mejôô wop mfa'a ya nkoane Zambe woñ, 2 a ndinlem ya ényiiñe ya nnôm éto, nje Zambe a ne te laa minsos a nga tiñeti ôsusua biyoñ ya kôa, 3 ve biyoñ bi nga yian a maneya liti mejô mé amu nkatane mbamba foé a nga veban e be ma, ane abendé Zambe Nyii wongan é né. 4 M'atili Titus, nya monô wom aval ane fufula mbunan a né : Mvam a mvo'é bi bo'o e be wo, bi so'o e be Zambe Esaa a e be Krist Yésus Nyii wongan.

## Esaé Titus Mfa'a Ya Kréta

( 1 Tim 3 : 1-7 ; 1 Pét 5 : 1-4)

5 E jam di nde me nga lí'i wo de e Kréta, na, ô kôme mam me nga buk, a na ô télé bemvendé nlam ôse ane me nga bendé wo, 6 nge môêt éziñ a ne te bijô, nnôma minga wua, a bili bon be ne bebuni, ba bôt be ne te bo'olô na be ne ézezam nge melo. 7 Amu évek, ane mboésaaé Zambe, a yiane bo te bijô ; a nji yiane bo mebun, nge avôle ya yaa, nge nso'o bilam, nga évô, nge ôzañ akum, 8 ve môêt anyep, môêt a nye'e mam me ne mvaé, a jôô nleme wé, môêt a ne zôsôô, étyi, nyô a jôô émien ; 9 nyô a kabetan a ñye'elane mejô ya mbunan, nde ete a ye bo ngul ya ye'ele mvo'é ñye'elan, a sôlane fe ba b'awosane wô.

10 Amu bôt abui be ne melo, mimfôfop mi bôt a bôte medu'an, adañedañ ba ya ngam bentyi'an atyele; 11 mmbe menyu map m'ayiane diban, amu b'asô'ôlô mingum menda me bôt e si a ñye'elane ya mam be ne te yiane ye'ele, ve amu mvin ñyoñane meya'an. 12 Môête wua ya be be, nkulemejô wop bebien, a nga jô na,

Bôt ya kréta be ne belaa minsos kom ése, mbia betit, minlelese mi bôt be ne ndok.

13 Mbo'olane wuna ô ne bebela. Ajô ete ô kpwa'ane be de a ayok, ane b'aye bo mvo'é e mbunan, 14 be za vô'ôlô minkana Beyude a memvinda me bôt be beneya benya mejôô. 15 Mam mese me ne mfuban e be ba be ne mfuban, ve e be ba be ne mvin a be te buni, teke'e jam e ne mfuban; minsimesane miap bebien e mone tyiña nleme wop bi ne mvin. 16 B'ameme na b'ayeme Zambe, ve b'akate nye a mimboane miap; be ne bôt b'abeneban, melo, a teke'e yian mfa'a ya mbamba jam ase.

## Nye'elan mvo'é Nye'elan

( Besam 119: 9; Ef 6 : 5-8; 1 Tim 2 : 9-15; 1 Pét 2 : 18-20; 3 : 1-6)

Rev. Matthias MEYE  
Secrétaire Général 1961.....

**2** 1 Ve wo, ô kobôô mam m'ayiane mvo'é ñye'elan. 2 Bemvendé befam be bo'o éjijin, bebebela be bôt, fe, mvo'é e mbunan, a nye'an a mbane njiban. 3 Bemvendé be binga aval ete fe, bebo'o ésemen mfa'a ya ényiñe jap, sa beso'é bôt nge belo be nyuane wain, 4 ane be ne tyeñele bisoé bi binga na, be nye'e beyôme bap a bone bap, 5 be bo fek, be tabe mfuban a ba'ale biôm ya nda, be bo mbamba nlem, be suu bebien e si e be beyôme bap bebien, ane mejô me Zambe me za biaséban. 6 Aval ete fe ô lebe bendômane be bôt na, be jôô bebien. 7 Liti'i womien mimfa'a mise na, ô ne éve'ela'a mbamba mimboan, mfa'a ya ñye'elan ô liti'i nya zôsôô, éjijin, 8 a mvo'é nkobô é ne te veban bijô, nde ete nyô a ne ngame yat a ye wôô ôson, amu a nji bi mbia jam a ne tote bia. 9 Bendé'é belo na, be suu bebien e si e be beti bap, a na, be va'a be minlem mevak mimfa'a mise; be bo'o te bo mfeta'ane, 10 teke'e wup, ve na be bili fulu ya tu'a buni be, ane b'aye bo ñye'elane Zambe Nyii wongan jam ya semé mimfa'a mise.

11 Amu mvame Zambe é maneya yené amu nyiane bôte bese, 12 é tyeñele'e bia na bi bo te tabe teke'e mbunan, ntabane mbia minkômbane ya si ndône nyô, ve na bi tabe éjijin, a zôsôô a nkoane Zambe woñ e si nyô, 13 nté bi ayange mbamba ndinlem, ñyenan étôto'o ya beta Zambe a Nyii wongan, Yésus Krist, 14 nnye a nga ve émien amu ajô dangan a kôté bia mfa'a ya ékôtekot ése, a tun émien bôt b'aye ve minlem ya bo mbamba mimboan. 15 Okobôô mam ma; ô lebek, ô kpwa'ane fe be me a ngulenjôan ése. Môt a bo'o te biasé wo.

### **Nyemetan Mbamba Mimboan**

( Rôm 16 : 17, 18; Ef 2 : 1-10; Tit 2 : 11-15; 1 Pét 2 : 13-16)

**3** 1 O simesa'ane be na be suu bebien e si e be bejôô a bôt be bili ngulenjôan, be bo mewôk, be bo nkôman ya bo mbamba ésaé ase, 2 be bo te kobô môô éziñ ébiasé, nge bo meluman, be bo évôvoé, a liti nlem ô ne mvam e be bôte bese. 3 Amu biabebien bi mbe mekut melu mvus, belo be mbia minkômban a mam ya mevak mevale meva, bi nga tabe ényiñ ya mboan abé a minyamete, bôt be siñe bia, bi siña'ane fe; 4 ve éyoñ mvam a nye'ane bôt Zambe Nyii wongan bi nga yené, 5 a nga nyii bia, sa ke amu mimboane bi nga bo e zôsôô été, ve amu nkoane éngôngole wé émien, a nsôbane ya mfefé abialé a mboane mfefé Mfufub Nsirim, 6 nnye ate Zambe a nga sôe e be bia abui abui amu Yésus Krist Nyii wongan, 7 ane bi aye kabe amu mvame jé, a bo benyoñe ngab aval ane ndinlem ya ényiñ ya nnôm éto é né.

8 Njôane wuna ô ne wu ya buni, m'anye'e na ô yemete mam ma, nde ete ba be buniya Zambe be bo atyeñ ya yemete mbamba mimboan; mam mete me ne mvaé, m'avolô bôt. 9 Ve ô sa'ale'e bisô mekut, a nlañane bindan, a mintañete, a meluman ajô minjôan, amu bi ne te volô jôm, bi ne zesé. 10 Môô a té mengam, nge a leban éyoñe jia nge bibaé, ô bene nye, 11 ô yeme na avale môô ete e ne ékotekot, mboabé, a ntoo môô a ve émien mekua.

### **Mam me Paul émien a mebatan**

( Yôh 15 : 8 ; 1 Kor 16 : 20-24)

12 Eyoñ m'aye lôm Artémas nge Tikikus e be wo, ô jika'a zu koane ma e Nikôpôlis, amu me tyi'iyia na m'aye lôô ôyône wu wôé. 13 O jika'a lí'itane Zénas, ñye'ele metiñ, baa Apôlos, dulu dap; ane jôm j'aye bo te jembane be. 14 Bôte bangan be yéké'é ve bebien mfa'a ya mbamba mimboan, ane b'aye volô bôt e biyoñe ya meyangane map, be za bo teke'e bibuma.

15 Bôte bese bia be be bi too b'abatane wo. O sili'i ba b'anye'e bia e mbunan été. Mvam é bo'o e be mia bese.



Rev. Matthias MEYE  
Secrétaire Général 1961.....